

**Meeqqanut suli atualinngitsunut perorsaanikkut inerikkiartuutaasumik ulluunerani neqeroorutitut akiliuteqartarneq pillugu Namminersorlutik Oqartussat nalunaarutaat nr. 17, 27. november 2009-meersoq Atuussimasoq (Historisk)**

Meeqqanut suli atualinngitsunut perorsaanikkut inerikkiartuutaasumik ulluunerani neqeroorutit pillugit Inatsisartut peqqussutaanni nr. 10, 5. december 2008-meersumi § 5, imm. 1, nr. 1 naapertorlugu aalajangersarneqarpoq.

**Akit**

§ 1. Kommunalbestyrelsen meeqqat meeqqanut suli atualinngitsunut ulluunerani neqeroorutiniinnerinut ukiup tulliani akiliutissat kingusinnerpaamik novemberip qaammataani aalajangersassavaat.

Imm. 2. Akit aalajangersarneqassapput kommunit meeqqanut suli atualinngitsunut ulluunerani neqeroorutitut ukiumut aningaasartuutissatut missingersuusiat aamma akiliisussaatitaasut aningaasaqarnikkut atugarisaat tunngavigalugit, akiliisussaatitaasullu ukiumut isertitaat naapertorlugit aalajangiunneqassallutik.

§ 2. Kommunalbestyrelsen akit meeqqanut 0-imiik 2-nut aamma 3-niit 6-inut ukiulinnut assigiinngitsut aalajangiussinnaavai.

Imm. 2. Sunngiffimmi sammisaqartitsinerup aqqissugaanera pillugu Inatsisartut inatsisaata akuersissutigineqarnissaata tungaanut, tak. Meeqqanut suli atualinngitsunut perorsaanikkut inerikkiartuutaasumik ulluunerani neqeroorutit pillugit Inatsisartut peqqussutaanni nr. 10, 5. december 2008-meersumi § 31, imm. 3, meeqqat fritidshjemminiinnerinut akit immikkut aalajangersarneqarsinnaapput.

Imm. 3. Kommunalbestyrelsen kommunimi illoqarfinni nunaqarfinnilu akit assigiinngitsut aalajangiussinnaavai. Taamaattoq illoqarfiup nunaqarfiulluunniit ataatsip iluani meeqqeriviit ataasiakkaarlugit assigiinngitsunik akeqartussanngorlugit aalajangersaasoqarsinnaanngilaq.

Imm. 4. Kommunalbestyrelsen angerlarsimafinni paarsinermut kommunip aqqissugaanut immikkut akiliuteqartarnissaq aalajangiussinnaavaa.

Imm. 5. Kommunalbestyrelsen meeqqat sapaatip-akunneranut nalunaaquttap-akunneri 25-t tikillugit meeqqanut suli atualinngitsunut ulluunerani neqeroorutiniittartut affaannarmik akeqarnissaat aalajangiussinnaavaa.

§ 3. Akit skala ataaniittoq malillugu aalajangerneqartassapput:

|                       | % minnerpaamik | % annerpaamik |
|-----------------------|----------------|---------------|
| Indtil - 149.999 kr.  | 0              | 5             |
| 150.000 – 174.999 kr. | 5              | 6             |
| 175.000 – 199.999 kr. | 5              | 7             |
| 200.000 – 224.999 kr. | 5              | 8             |
| 225.000 – 249.999 kr. | 5              | 10            |
| 250.000 – 274.999 kr. | 5              | 15            |
| 275.000 – 299.999 kr. | 10             | 20            |
| 300.000 – 324.999 kr. | 10             | 22            |
| 325.000 – 349.999 kr. | 10             | 24            |
| 350.000 – 374.999 kr. | 10             | 26            |
| 375.000 – 399.999 kr. | 10             | 28            |
| 400.000 – 424.999 kr. | 10             | 30            |
| 425.000 – 449.999 kr. | 10             | 32            |
| 450.000 – 474.999 kr. | 10             | 34            |
| 475.000 – 499.999 kr. | 10             | 36            |
| 500.000 – 549.999 kr. | 10             | 39            |
| 550.000 – 599.999 kr. | 10             | 42            |
| 600.000 – 649.999 kr. | 10             | 45            |
| 650.000 – 699.999 kr. | 10             | 48            |
| 700.000 – 749.999 kr. | 10             | 51            |
| 750.000 – 799.000 kr. | 10             | 54            |
| 800.000 – og derover  | 10             | 57            |

**§ 4.** Akiliisussaatitaasoq imaluunniit akiliisussaatitaasut , tak. § 5, kommunalbestyrelsip § 1, imm. 1 naapertorlugu akit annertussusissaanut aalajangiinerata kinguninngua, akit annertussusaat pillugu ilisimatinneqassapput.

#### Akiliisussaatitaaneq

**§ 5.** Akiliisussaatitaapput meeqqap inuit aqqisa allattorsimaffiat naapertorlugu najugaqarfigisaa imaluunniit najugaqarfigisai, taamaattoq takukkit imm. 2 aamma 3, kiisalu § 6.

Imm. 2. Meeraq ilinniarnermut assigisaanulluunniit atatillugu nalinginnaasumik najugarisami avataani najugaqarallarpit, akiliisussaataapput meeqqap nalinginnaasumik najugaqarfigisaa imaluunniit najugaqarfigisai. Meeqqap najugaqarallarfeqalernerata kingorna sumi nalinginnaasumik najugaqarfeqarnera nalornisigineqalissappat, akiliisussaataasut tassaassapput ataatsimoortumik naliliisoqareerneratigut meeqqat nalinginnaasumik najugaqarfigisaatut ilimagisariaqartut.

Imm. 3. Meeraq nammeneq aaqqissuutamik ilaqutariinni paarineqarpat akiliisussaataasut Meeqqanik inuusuttunillu ikiorsiisarneq pillugu Inatsisartut peqqussutaanni § 20, imm. 3 naapertorlugu aalajangerneqassapput.

### *Akiliiffiusussaangitsumik ilaannakortumilluunniit akilimmik inissaq*

§ 6. Meeqqanut suli atualinngitsunut ulluunerani neqeroorutiniittunut kommunillu paaqqinnittarfiutaanniittunut 15-ini inorlugit ukiulinnut inissamik akiliiffiusussaangitsumik tamakkiisumik tunniussisoqartarpoq meeraq ulloq-unnuarlu paaqqinnittarfinniittunut imaluunniit pisortatigoortumik ilaqutariinni paaqqutarineqartunut.

§ 7. Meeqqanik inuusuttunillu ikiorsiisarneq pillugu Inatsisartut peqqussutaanni § 9 naapertorlugu ikiuniarluni suliniutinik aallartitsisoqarnissaanik aalajangiinnermut atatillugu kommunalbestyrelsi meeqqanut suli atualinngitsunut neqeroorutini inissamik akiliiffiusussaangitsumik ilaannakortumilluunniit akiliiffiusussamik tunniussinissamik aalajangiisinnaavoq.

### *Qatannugutiinnut akikillisaat*

§ 8. Akiliisussaataasooq imaluunniit akiliisussaataasut meeqqap 15-it inorlugit ukiullip meeqqanut suli atualinngitsunut ulluunerani neqeroorutiniittartup aamma fritidshjemmiittartup ataatsip saniatigut meeqqanik allanik akiliissutassaqaarunik meeqqamut angajullermut tamakkiisumik akiliisoqartassaaq, sinnerinullu affarmik akiliisoqartassalluni.

### *Naatsorsuinermi tunngavissaq*

§ 9. Meeqqanut ulluunerani neqeroorutiniittartunut akiliut aalajangerneqassaaq akiliisussaataasup imaluunniit akiliisussaataasut ukiumi isertitaqarfiusumi kingulliulluni naammassisumi isertitaat akileraaruteqaataasussat aallaavigalugit.

Imm. 2. Akiliisussaataasup imaluunniit akiliisussaataasut isertitat akileraaruteqaataasussat imm. 1-imi pineqartut allanngorpata kommunalbestyrelsi kalerrissavaat.

Imm. 3. Meeqqanut suli atualinngitsunut ulluunerani neqeroorutininermut akiliutit kommunalbestyrelsip allanngortissavai, tak. imm. 1. Taamaattoq taama pisoqannginnerani kommunalbestyrelsi isertitat akileraaruteqaataasussat imm. 1-imi pineqartut allannguutaat pillugit uppersaatissanik piniaqqaassaaq. Meeqqanut suli atualinngitsunut ulluunerani neqeroorutininermut akiliutit allanngornerat qaammammik ataatsimik sioqqutsisumik nalunaarutigineqassaaq, qaammatillu aallaqqaataaniit atuutilissalluni.

§ 10. Kommunalbestyrelsip aalajangersinnaavaa, isertitat akiliutinut tunngavigineqartut,

tassaassasut maannakkorpiaq isertitat, naleqqiussinikkut ukiumoortumik tamakkiisumik isertitatut naatsorsorneqartut, akiliisussaatitaasoq imaluunniit akiliisussaatitaasut isertitamikkut annertuumik allannqortoqarnera uppernarsarsinnaappassuk.

Imm. 2. Akileraarusiisarnermi oqartussaasut aningaasarsianik akileraaruteqaataasussanik siusinnerusukkut annertussusiliisimangippata akiliisarnissaq pisassaaq siumoortumik nalunaarsuineq tungavigalugu imaluunniit maannakkorpiaq isertitarisartakkat ukioq kaajallallugu isertitarisassatut naatsorsuussanut naleqqussareerlugit.

#### Isertitat pillugit nalunaarut

§ 11. Meeqqap meeqqanut suli atualinngitsunut ulluunerani neqeroorummut iserneranut atatillugu imaluunniit akiliisussaatitaasup allannqorneranut atatillugu, tak. § 5, akiliisussaatitaasoq imaluunniit akiliisussaatitaasut isertitat pillugit allakkatigut kommunalbestyrelsimut nalunaaruteqassapput.

Imm. 2. Isertitat pillugit nalunaarummut ilaassaaq kommunalbestyrelsimut pisinnaatitsissut, meeqqap meeqqanut ulluunerani neqeroorutiniinnera tamaat kommunalbestyrelsip akileraartarnermi oqartussaasunit akiliisussaatitaasoq imaluunniit akiliisussaatitaasut isertitaat pillugit paasiniaasinnaatinneqarneranik imaqartoq.

Imm. 3. Akiliisussaatitaasup imaluunniit akiliisussaatitaasut imm. 1-imi taaneqartutut nalunaaruteqanngippata, akiliutissaq qaffasinnerpaaq aalajangiunneqassaaq.

#### Akiligassat akilinngisat aamma ulluunerani neqerooruteqartarnermiikkunnaarsitsisarneq

§ 12. Akiliisussaatitaasoq imaluunniit akiliisussaatitaasut akiligassaminnik akilinngisaqalerpata, pineqartullu akiligassamik akilersornissaat pillugu isumaqatigiissusioqqullugit akiliinissamik eqqaasitsissummik tigusaqareersimappata meeraq pineqartoq perorsaanermik inerikkiartuutaasumik ulluunerani neqeroorutaasumiikkunnaartinneqassaaq, tak. § 13.

Imm. 2. Akiligassat akilinngisat tamarmik, akiliinissamik eqqaasitsissutip ullulerneraniit ullut 14-it qaangiutsinnagit akilerneqarpata, perorsaanermik inerikkiartuutaasumik ulluunerani neqeroorutaasumiikkunnaarsitsinermik aalajangiineq atorunnaassaaq.

Imm. 3. Akiligassanik akilinngisaqarneq pissutigalugu meeqqap perorsaanermik inerikkiartuutaasumik ulluunerani neqeroorutaasumiikkunnaarsittariaqarneranik akiliisussaatitaasumut imaluunniit akiliisussaatitaasunut nalunaaruteqarneq peqatigalugu isumaginninnermik suliaqartut kalerrinneqassapput.

§ 13. Meeqqamik perorsaanermik inerikkiartuutaasumik ulluunerani neqeroorutaasumiikkunnaarsitsinerit tamarmik minnerpaamik qaammammik ataatsimik sioqqutsisumik nalunaarutigineqartassapput qaammatip aallaqqaataani atuutilertussatut.

#### Atuutilersitsineq

§ 14. Nalunaarut manna 1. januar 2010 atuutilerpoq. Ilutigalugu Meeqqat ulluunerani paaqqinnittarfiutaaniinnerinut kommunillu aaqqissugaanik ulluunerani angerlarsimaffimmi

paaqqinniffinniinnerinut akiliuteqartarneq pillugu Namminersornerullutik Oqartussat nalunaarutaat nr. 18, 14. september 2006-imeersoq atorunnaarsinneqarpoq.

Imm. 2. Meeqqanut suli atualinngitsunut perorsaaniikkut inerikkiartuutaasumik ulluunerani neqeroorutinut akiliuteqartarnermut kommunalbestyrelsip 2010-mut aalajangiinermini Meeqqat kommunip ulluunerani paaqqinnittarfiutaaniinnerinut kommunillu aaqqissugaanik ulluunerani angerlarsimaffimmi paaqqinniffinniinnerinut akiliuteqartarneq pillugu nalunaarut nr. 18, 14. september 2006-imeersoq najoqqutarissavaa.

Namminersorlutik Oqartussat, ulloq 27. november 2009

Mimi Karlsen

/

Lise Lennert Olsen